



COUNCIL OF EUROPE CONSEIL DE L'EUROPE

**European Charter
for Regional
or Minority Languages**

**Charte européenne
des langues régionales
ou minoritaires**

**CJARTE EUROPEANE
DES LENGHIS REGJONÂLS O
MINORITARIIS**

FRIULIAN VERSION

Unofficial translation

VERSION FRIOULE

Traduction non officielle

CJARTE EUROPEANE DES LENGHIS REGJONÂLS O MINORITARIIS

(fate buine dal Consei d'Europe tal 1992)

Preambul

I Stâts membris dal Consei de Europe e che a àn firmât cheste cjarte,

Considerant che il fin dal Consei de Europe al è chel di realizâ une union plui strente tra i siei membris, in specie cul fin di protezi e promovî ideai e principis che a son il lôr patrimoni comun;

Considerant che la protezion des lenghis regjonâls o minoritariis storichis de Europe, che cualchidune di chês e riscje cul passâ dal timp di scomparî, e jude a mantignî e svilupâ lis tradizions e la ricjece culturâl de Europe;

Considerant che il drit di doprâ une lenghe regjonâl o minoritarie, sedi inte vite private che in chêe publiche al è un drit inalienabil che al va daûr dai principis contignûts tal Pat internazionâl sui dirits civîl e politics des Nazions Unidis e daûr dal spirt de Convenzion pe protezion dai Dirits dal Om e des Libertâts fundamentâls dal Consei de Europe;

Tignint cont dal lavôr fat inte suaze de CSCE e in particulâr dal At finâl di Helsinki dal 1975 e dal document de riunion di Copenhagen dal 1990;

Marcant il valôr dal interculturalisim e dal plurilinguism, e considerant che la protezion e l'incoragjament des lenghis regjonâls e minoritariis nol varès di gjavâ nuie aes lenghis uficiâls e ae necessitât di imparâlis;

Cussients dal fat che la protezion e la promozion des lenghis regjonâls e minoritariis intai diferents stâts e regjons de Europe a rapresentin un impuartant contribût par fâ sù une Europe fondade sui principis de democrazie e de diversitât culturâl, inte suaze de sovranitât nazionâl e de integritât teritoriâl;

Tignint cont des condizions specifichis e des tradizions storichis di ogni regjon dai Stâts de Europe,

A son dacuardi su chel che al ven daûr

PART I Disposizion gjenerâls

Art.1 Definizions

Secont cheste Cjarte:

a) cun lis peraulis "lenghis regjonâls o minoritariis", si intindin lis lenghis che a son:

- i) dopradis in mût tradizionâl intun ciert teritori di un stât dai citadins dal stes stât che a formin un grup che par numar al è inferiôr al rest de popolazion di chel stât, e,
- ii) diferents de(des) lenghe(is) uficiâls di chest stât;

par altri no cjapin dentri ni i dialets de (des) lenghe(is) ni lis lenghis dai migrants;

b) cun "teritori dulà che une lenghe regjonâl o minoritarie e je doprade", si intint la aree gjeografiche dulà che cheste lenghe e je il mieç di espression di un numar di personis che al justifichi la introduzion di misuris diferents di protezion e promozion previodudis in cheste Cjarte;

c) cun "lenghis cence teritori", si intindin lis lenghis dopradis dai citadins dal Stât che a son diferentis de(des) lenghe(is) doprade(is) dal rest de popolazion dal stât ma che, se ancje dopradis in mût tradizional intal stât, no si pues leâlis a une aree particolâr.

Art. 2 Impegn

1) Ognidune des Parts si impegne a meti in vore lis disposizions de part 2 a dutis lis lenghis regjonâls o minoritariis dopradis sul so teritori e che a van daûr des definizions dal articulo 1.

2) Par chel che si inten a ogni lenghe indicade tal moment de ratificazion, acetazion o aprovazion, seont l'articulo 3, ogni Part si impegne a meti in vore almancul 35 paragrafs o sotparagrafs sielzûts tra lis disposizions de part 3 di cheste Cjarte, dulà che almancul 3 a sedin sielzûts in ducj e doi i articui 8 e 12 e un in ducj i cuatri articui 9, 10, 11 e 13.

Art. 3 Modalitâts di atuazion

1) Ogni Stât firmatari al à di specificâ tal so document di ratificazion, acetazion o aprovazion, ogni lenghe regjonâl o minoritarie, o ogni lenghe uficiâl mancul doprade in dut o nome une part dal so teritori, dulà che si metin in vore i paragrafs sielzûts daûr dal paragraf 2 dal articulo 2.

2) Ogni Part e pues, in ogni moment seguitîf, notificâ al Segretari Gjenerâl che jê e acete lis obligazion che a divegnin des disposizions di ogni altri paragraf de Cjarte che nol jere stât specificât tal so document di ratificazion, acetazion o aprovazion o che jê e metarà in vore il paragraf 1 di chest articulo a altris lenghis regjonâls o minoritariis o a altris lenghis uficiâls mancul dopradis su dut o nome une part dal teritori.

3. I impegn previodûts tal paragraf precedent a saran calculâts tant che part integrant de ratificazion, acetazion o de aprovazion e a varan i stes efets començant de date de lôr ratificazion.

Art. 4 Statûts di protezion che a esistin

1) Nissune disposizion di cheste Cjarte no pues sei interpretade tant che limit o deroghe rispjet ai dirits garantîts de Convenzion Europeane dai Dirits dal Om.

2) Lis disposizions di cheste Cjarte no prejudichin lis disposizions plui favorevulis che a rezin la situazion des lenghis regjonâls o minoritariis o il status juridic des personis che a fasin part des minorancis e che a esistin bielzà intune Part o che a son previodudis di pats internazionâi bilaterâi o multilaterâi al rivuart.

Art. 5 Oblics che a esistin

Nissune disposizion di cheste Cjarte e podarà sei interpretade tant che dirit di inmanê une qualsisei ativitât o di davuelzi qualsisei azion che e ledi cuntri des finalitâts de Cjarte des Nazions Unidis o di altris oblics di dirit internazionâl, comprendût il principi di sovranitât o di integritât teritoriâl dai Stâts.

Art. 6 Informazion

Lis Parts si impegnin a controlâ che lis autoritâts, organizacions e personis interessadis a sedin informadis sui dirits e sui dovês disponûts di cheste Cjarte.

PART II
Obietîfs e principis metûts in vore daûr dal paragraf 1 dal articul 2

Art. 7
Finalitâts e principis

1) In fat di lenghis regjonâls o minoritariis, tai teritoris dulà che chestis lenghis a son dopradis e daûr de situazion di ogni lenghe, lis Parts a tegnin tant che fonde de lôr politiche, de lôr legislazion e de lôr pratiche lis finalitâts e i principis che a vegnin daûr:

- a) il ricognossiment des lenghis regjonâls o minoritariis tant che espression de ricjece culturâl;
- b) il rispîet de aree gjeografiche di ogni lenghe regjonâl o minoritarie procurant che lis divisions amministrativis za in vore o gnovis no inderedin la promoziun di cheste lenghe regjonâl o minoritarie;
- c) la necessitât di une fuarte azion di promoziun des lenghis regjonâls o minoritariis cun chês di protezilis;
- d) facilitâ e incoragjâ l'ûs orâl e scrit des lenghis regjonâls o minoritariis te vite publiche e in chês private;
- e) mantignî e disvilupâ relaziuns, tai cjamps comprendûts in cheste Cjarte, jenfri i grups che a doprin une lenghe regjonâl o minoritarie e altris grups dal stes Stât che a fevelin une lenghe doprade in forme compagne o parele, e ancje instaurâ relaziuns culturâls cun altris grups dal Stât che a doprin formis diferentis;
- f) proviodi formis e mieçs adats di insegnament e studi des lenghis regjonâls o minoritariis in ducj i stadis adats;
- g) proviodi imprescj che ur permetin a chei che no fevelin une lenghe regjonâl o minoritarie, e che a vivin tal teritori dulà che cheste e je doprade, di imparâle, se a vuelin;
- h) promovî i studis e la ricercje su lis lenghis regjonâls o minoritariis tes universitâts o istitûts ecuivalents;
- i) promovî formis adatis di scambis transnazionâi, tai cjamps tratâts di cheste Cjarte, pes lenghis regjonâls o minoritariis dopradis in forme compagne o parele in doi o plui Stâts.

2) Lis Parts si impegnin a eliminâ, se no lu àn za in mò fat, ogni distinzion, escluson, restrizion o preference no justificade a riuart dal ûs di une lenghe regjonâl o minoritarie e che e vedi il fin di scoragjâ o di meti in pericol il so mantigniment o il so svilup. La adozion di disposiziuns speciâls a pro des lenghis regjonâls o minoritariis par promovî la avualiance tra personis che a fevelin chestis lenghis e il rest de popolazion o che a tegnin cont des lôr particolârs situaziuns, nol è considerât at discriminatori cuintri di chei che a fevelin lenghis mancual dopradis.

3) Lis Parts si impegnin a promovî, mediant di misuris adatis, la comprension reciproche tra ducj i grups linguistics dal paîs, in specialitât fasint di mût che il rispîet, la comprension e la tolerance a riuart des lenghis regjonâls o minoritariis a figurin tra i obietîfs de istruzion e de formazion furnide tal paîs, e a incoragjâ i mieçs di comunicazion massive a rivâ al stes obietîf.

4) Tal definî la lôr politiche a riuart des lenghis regjonâls o minoritariis, lis Parts si impegnin a cjapâ in considerazion lis dibisugnis e la volontât dai grups che a doprin chestis lenghis. Lis stessis a son incoragjadis a inmaneâ, se al è necessari, orghins cul incarghe di conseâ lis autoritâts in dutis lis cuistions a riuart des lenghis regjonâls o minoritariis.

5) Lis Parts si impegnin a meti in vore "mutatis mutandis" i principis indicâts tai paragrafs di 1 a 4 aes lenghis cence teritori. Par altri, tal câs di chestis lenghis, la nature e la dimension des misuris di cjoli par rindi efetive cheste Cjarte a saran determinadis in mût flessibil tignint cont des dibisugnis e de volontât e rispîetant lis tradiziuns e lis carateristichis dai grups che a doprin lis lenghis in cuistion.

PART III
Misuris a pro dal ûs des lenghis regjonâls o minoritariis te vite publiche, di cjoli in conformitât dai impegn sotscrets daûr dal paragraf 2 dal articol 2

Art. 8
Istruzion

1) In fat di istruzion lis Parts si impegnin, tal teritori dulà che chestis lenghis a son dopradis, daûr de situazion di ogni lenghe e cence pregiudizi pal insegnament de(des) lenghe(is) uficiâl(s) dal Stât,

a)

i) previodi une educazion prescolâr proferide tes lenghis regjonâls o minoritariis; o

ii) previodi che une part impuartant de istruzion prescolâr e sedi proferide tes lenghis regjonâls o minoritariis; o

iii) meti in vore une des misuris previodudis dai ponts i) e ii) parsore riclamâts almancul ai arlêfs che lis lôr fameis lu vuelin e che il lôr numar al sedi calculât sufficient; o

iv) se i podês publics no àn competence direte tal cjamp de istruzion prescolâr, facilitâ e/o incoragjâ la metode in vore des misuris previodudis dai ponts i) al iii);

b)

i) previodi une istruzion primarie proferide tes lenghis regjonâls o minoritariis; o

ii) previodi che une part impuartant de istruzion primarie e sedi proferide tes lenghis regjonâls o minoritariis; o

iii) previodi, te suaze de istruzion primarie che l'insegnament des lenghis regjonâls o minoritariis al sedi part integrant dal curriculum; o

iv) meti in vore une des misuris previodudis dal pont i) al pont iii) almancul ai arlêfs che lis fameis lu vuelin e che il lôr numar al sedi calculât sufficient;

c)

i) previodi une istruzion secondarie proferide tes lenghis regjonâls o minoritariis; o

ii) previodi une part impuartant de istruzion secondarie tes lenghis regjonâls o minoritariis; o

iii) previodi, te suaze de istruzion secondarie, l'insegnament des lenghis regjonâls o minoritariis tant che part integrant dal curriculum; o

iv) meti in vore une des misuris previodudis dal pont i) al pont iii) sore nomenâts almancul ai arlêfs che lu vuelin o, salacor, che lis lôr fameis lu vuelin in numar calculât sufficient;

d)

i) previodi une istruzion tecniche e professionâl tes lenghis regjonâls o minoritariis; o

ii) previodi che une part impuartant de istruzion tecniche e professionâl e sedi proferide tes lenghis regjonâls o minoritariis ; o

iii) previodi, te suaze de istruzion tecniche e professionâl, l'insegnament des lenghis regjonâls o minoritariis tant che part integrant dal curriculum; o

iv) meti in vore une des misuris previodudis dal pont i) al pont iii) sore riclamâts almancul ai arlêfs che lu vuelin o salacor, che lis lôr fameis lu vuelin in numar calculât sufficient;

e)

i) previodi une istruzion universitarie o altris formis di istruzion superiôr tes lenghis regjonâls o di minorance; o

ii) previodi il studi di chestis lenghis, tant che materiis di insegnament universitari o superiôr; o

iii) se, cause la posizion dal Stât, a rivuart dai istitûts di istruzion superiôr, i ponts i) e ii) no puedin jessi metûts in vore, incoragjâ e/o autorizâ la istituzion di insegnaments universitaris e di altris formis di istruzion superiôr tes lenghis regjonâls o minoritariis, o di mieçs che a permetin di studiâ chestis lenghis te universitât o in altris istitûts di istruzion superiôr;

f)

i) cjoli misuris par che a sedin fats cors di istruzion par adults o di istruzion permanent proferîts soredut o dal dut tes lenghis regjonâls o minoritariis; o

ii) proferî chestis lenghis tant che materiis de istruzion dai adults o de istruzion permanent; o

iii) se i podêts publics no àn competence direte te sfere de istruzion dai adults, favorî e/o incoragjâ l'insegnament di chestis lenghis te suaze de istruzion dai adults e de istruzion permanent;

g) cjoli misuris par garantî l'insegnament de storie e de culture che la lenghe regjonâl o minoritarie e je lôr espression;

h) proviodi la formazion di fonde e permanent dai insegnants necessarie par meti in vore i paragrafs di a) a g) acetâts de Part;

i) creâ un o plui orghins di sorevision par stâur daûr aes misuris cjapadis e ai progrès fats te istruzion e tal disvilup dal insegnament des lenghis regjonâls o minoritariis e di meti jù su chescj ponts relacions periodichis che a saran rindudis di publiche cognossince.

2) In fat di istruzion e par chel che al rivuarde altris teritoris rispjet a chei dulà che lis lenghis regjonâls o minoritariis a son dopradis par tradizion, lis Parts si impegnin a autorizâ, incoragjâ o istituî, se il numar di chei che a doprin une lenghe regjonâl o minoritarie lu justifiche, un insegnament te o de lenghe regjonâl o minoritarie a ducj i nivei adats di istruzion.

Art. 9

Justizie

1) Lis Parts si impegnin, par chel che si inten aes circoscrizions judiziaris dulà che il numar dai abitants che a doprin lis lenghis regjonâls o minoritariis al justifiche lis misuris culî disot indicadis e daûr de situazion di ognidune di chestis lenghis e cul pat che l'ûs des pussibilitâts ufiertis di chest paragraf nol sedi calculât tant che un pidiment ae buine aministrazion de justizie:

a) tai procediments penâi:

i) a previodi che lis autoritâts judiziaris, daûr domande di une des parts a imbastissin i procediments tes lenghis regjonâls o minoritariis; e/o

ii) a garantî al incolpât il drit di doprâ la sô lenghe regjonâl o minoritarie; e/o

iii) a previodi che lis domandis e lis provis, scritis o orâls, no sedin consideradis no ricevibilis nome parcè che a son presentadis intune lenghe regjonâl o minoritarie; e/o

iv) a produci, daûr domande, in chestis lenghis regjonâls o minoritariis, i ats leâts a un procediment judiziari; se al covente mediant di interpretis e traduzions che no implichin spesis in plui pai interessâts;

b) tai procediments civîi:

i) a previodi che lis autoritâts judiziaris, daûr domande di une des parts a imbastissin il

procediment tes lenghis regjonâls o minoritariis; e/o

ii) a permeti, cuant che une des parts in cause e à di comparî in persone denant di un tribunâl, che e dopri la sô lenghe regjonâl o minoritarie cence scugnî par chel sopuartâ spesis in plui; e/o

iii) a permeti la produzion di documents e provis tes lenghis regjonâls o minoritariis, se al covente mediant di interpretis e di traduzions;

c) tai procediments denant des juridizions competentis te materie aministrative:

i) a previodi che lis autoritâts judiziariis, daûr domande di une des parts, a imbastissin il procediment tes lenghis regjonâls o minoritariis; e/o

ii) a permeti, cuant che une des parts in cause e à di comparî in persone denant di un tribunâl, che e dopri la sô lenghe regjonâl o minoritarie cence scugnî par chel sopuartâ spesis in plui; e/o

iii) a permeti la produzion di documents e provis tes lenghis regjonâls o minoritariis, se al covente mediant di interpretis e di traduzions;

d) a cjoli misuris par che la aplicazion dai sotparagrafs i e iii dai paragrafs b) e c) sore nomenâts e che l'ûs eventuâl di interpretis e di traduzions nol implichi spesis in plui pai interessâts.

2) Lis Parts si impegnin

a) a no dineâ la validitât dai ats juridics compîts tal Stât nome par vie che a son redizûts intune lenghe regjonâl o minoritarie; o

b) a no dineâ la validitât, tra lis parts, dai ats juridics compîts tal Stât nome par vie che a son redizûts intune lenghe regjonâl o minoritarie e a previodi che si podarà oponiju ai tierçs interessâts che no cognossin chestis lenghis, a condizion che il contignût dal at al sedi pandût a chei di bande di cui che lu à fat valê; o

c) a no dineâ la validitât, tra lis parts, dai ats juridics compîts tal Stât nome par vie che a son redizûts intune lenghe regjonâl o minoritarie.

3) Lis Parts si impegnin a proferî, tes lenghis regjonâls o minoritariis, i plui impuartants tescj legjislatîfs dal Stât e chei che a rivuardin in mût particolâr chei che a doprin chestis lenghis, fale che no sedin bielzà disponibii in altre maniere.

Art. 10

Autoritâts aministrativis e servizis publics

1) Intes circoscrizions des autoritâts aministrativis statâls dulà che il numar di chei che a fevelin lenghis regjonâls o minoritariis al justifici lis misuris culî disot indicadis e daûr de situazion di ogni lenghe, lis Parts si impegnin, là che al è pussibil in mût resonevul, a:

a)

i) sigurâsi che lis autoritâts aministrativis a doprin lis lenghis regjonâls o minoritariis; o

ii) sigurâsi che i lôr impleâts che a son a contat cul public a doprin lis lenghis regjonâls o minoritariis tes lôr relacions cu lis personis che si indrecin a lôr in chestis lenghis; o

iii) sigurâsi che chei che a fevelin lenghis regjonâls o minoritariis a puedin presentâ domandis sedi scritis che a vôs e vê rispueste in chestis lenghis; o

iv) sigurâsi che chei che a fevelin lenghis regjonâls o minoritariis a puedin presentâ domandis scritis o a vôs in chestis lenghis;

v) sigurâsi che chei che a fevelin lenghis regjonâls o minoritariis a puedin proferî un document redizût in chestis lenghis cun plene validitât;

b) ameti formularis e tescj aministratîfs di ûs comun pe popolazion tes lenghis regjonâls o minoritariis, o in version bilengâl;

c) permeti aes autoritâts aministrativis di redizi documents intune lenghe regjonâl o minoritarie.

2) Par chel che si inten aes autoritâts locâls e regjonâls tai teritoris dulà che al è a stâ un numar di residents che a doprin lenghis regjonâls o minoritariis che al justifici lis misuris culî dongje nomenadis, lis Parts si impegnin a permeti e/o a incoragjâ:

a) l'ûs des lenghis regjonâls o minoritariis te suaze de amministrazion regjonâl o locâl;

b) la pussibilitât, par chei che a doprin lenghis regjonâls o minoritariis, di presentâ domandis a vôs o par scrit in chestis lenghis;

c) la publicazion, de bande des autoritâts regjonâls dai lôr tescj uficiâi, ancje tes lenghis regjonâls o minoritariis;

d) la publicazion, de bande des autoritâts locâls dai lôr tescj uficiâi, tes lenghis regjonâls o minoritariis;

e) l'ûs de bande des autoritâts regjonâls des lenghis regjonâls o minoritariis tai dibatiments des lôr assembleis, cence par altri dineâ l'ûs de(s) lenghe(is) uficiâl(s) dal Stât

f) l'ûs de bande des autoritâts locâls des lenghis regjonâls tai dibatiments des lôr assembleis, cence par altri dineâ l' ûs de(s) lenghe(is) uficiâl(s) dal Stât;

g) l'ûs e la introduzion, salacor parie cu la denominazion te(s) lenghe(is) uficiâl(s), des formis tradizionâls e justis de toponomastiche tes lenghis regjonâls o minoritariis.

3) Par chel che si inten ai servizis publics proviodûts des autoritâts aministrativis o di altris personis che a operin par cont lôr, lis Parts si impegnin, tai teritoris dulà che lis lenghis regjonâls o minoritariis a son dopradis, in funzion de situazion di ogni lenghe, là che al è pussibil in mût resonevul, a:

a) sigurâsi che lis lenghis regjonâls o minoritariis a sedin dopradis tal ocasion de prestazion dai servizî; o

b) permetiur a chei che a fevelin lis lenghis regjonâls o minoritariis di presentâ une domande e ricevi une rispueste in chestis lenghis; o

c) permetiur a chei che a fevelin lis lenghis regjonâls o minoritariis di presentâ une domande in chestis lenghis.

4) Par meti in vore lis disposizion dai paragrafs 1, 2 e 3 acetadis di lôr, lis Parts si impegnin a cjoli une o plui di une des misuris culî sot indicadis:

a) la traduzion e la interpretazion in câs di domande;

b) il reclutament e, salacor, la formazion dai funzionaris e di altris dipendents publics necessaris;

c) il sodisfâ, par tant che al è pussibil, lis domandis dai impleâts publics che a cognossin une lenghe regjonâl o minoritarie di jessi assegnâts tal teritori dulà che cheste lenghe e je doprade.

5) Lis Parts si impegnin a permeti, daûr domande dai interessâts, l'ûs o la introduzion de onomastiche tes lenghis regjonâls o minoritariis.

Art. 11 Media

1) Lis Parts si impegnin, par chei che a fevelin lenghis regjonâls o minoritariis, tai teritoris dulà che chestis lenghis a son feveladis, daûr de situazion di ogni lenghe e tai limits che lis autoritâts

publichis a àn, in maniere direte o indirete, une competence, podês o une funzion in chest cjamp, e tal rispjet dai principis di independence e di autonomie dai media:

a) tai limits che la radio e la television a àn une funzion di servizi public:

i) a sigurâ la creazion di almancul une stazion radio e di un canâl televisîf tes lenghis regjonâls o minoritariis; o

ii) a incoragjâ e/o facilitâ la creazion di almancul une stazion radio e di un canâl televisîf tes lenghis regjonâls o minoritariis; o

iii) a cjoli disposizions adatis par che lis stazions di trasmission a programin emissions tes lenghis regjonâls o minoritariis;

b)

i) a incoragjâ e/o facilitâ la creazion di almancul une stazion radio tes lenghis regjonâls o minoritariis;

ii) a incoragjâ e/o a facilitâ la emission di programs radio tes lenghis regjonâls o minoritariis, in mût regolâr;

c)

i) a incoragjâ e/o a facilitâ la creazion di almancul un canâl televisîf tes lenghis regjonâls o minoritariis; o

ii) a incoragjâ e/o a facilitâ la emission di programs televisîfs tes lenghis regjonâls o minoritariis, in mût regolâr;

d) a incoragjâ e/o facilitâ la produzion e la difusion di oparis audio e audiovisivis tes lenghis regjonâls o minoritariis;

e)

i) a incoragjâ e/o facilitâ la creazion e/o il mantigniment di almancul un orghin di stampe tes lenghis regjonâls o minoritariis; o

ii) a incoragjâ e/o facilitâ la publicazion di articui di stampe tes lenghis regjonâls o minoritariis, in mût regolâr;

f)

i) a integrâ lis spesis in plui dai media che a doprin lis lenghis regjonâls o minoritariis, se la leç e previôt une assistance finanziarie, in gjenerâl, pai media;

ii) di slargjâ lis misuris za in vore di assistance finanziarie aes produzioni audiovisivis tes lenghis regjonâls o minoritariis;

g) a sostignî la formazion di gjornaliscj e di altri personâl pai media che a doprin lis lenghis regjonâls o minoritariis.

2) Lis Parts si impegnin a garantî la libertât di ricezion direte des emissions radiotelevisivis dai Paîs confinants intune lenghe doprade in forme identiche o parele a di une lenghe regjonâl o minoritarie, e a no oponisi ae ritrasmission di emissions radiotelevisivis dai Paîs confinants in chês stesse lenghe. Si impegnin ancje a sigurâ che nissune limitazion ae libertât di espression e ae libare circolazion de informazion intune lenghe doprade in forme identiche o parele a une lenghe regjonâl o minoritarie no sedi imponude ae stampe. L'esercizi des libertâts soreddis che a implicin dovês e responsabilitâts al pues jessi sometût a formalitâts, condizions, restrizions o sanzions previodudis de leç, che a rapresentin misuris necessariis, intune societât democratiche, pe sigurece nazionâl, pe integritât teritoriâl e pe sigurece publiche, pe difese dal ordin e pe prevenzion de criminalitât, pe protezion de salût e de moralitât, pe protezion de reputazion e dai dirits di chei altris, par prevignî la divulgazion di informazions riservadis o par garantî la autoritât e la imparzialitât dal podê judiziari.

3) Lis Parts si impegnin a sigurâsi che i interès di chei che a fevelin lis lenghis regjonâls o

minoritariis a sedin rapresentâts o tignûts in considerazion te suaze des struturis in câs creadis secont de leç e che a àn di garantî la libertât e la pluralitât dai media.

Art. 12 Ativitâts e imprescj culturâi

1) In fat di ativitâts e di imprescj culturâi - in mût particolâr di bibliotechis, videotechis, centris culturâi, museus, archivis, academiis, teatris e cines, come ancje di produzion leterarie e produzion cinematografiche, di espression culturâl popolâr, di festivals, di industriis culturâls, massime cjapant dentri l'ûs des gnovis tecnologjiis - lis Parts si impegnin, par chel che si inten al teritori dulà che chestis lenghis a son dopradis, tai limits che lis autoritâts publichis a àn competencis, podês o une funzion in chest cjamp, a:

a) incoragjâ la espression e lis iniziativis specifichis a pro des lenghis regjonâls o minoritariis e facilitâ i diviers mûts di acès aes oparis produsudis in chestis lenghis;

b) facilitâ i diviers mûts di acès in altris lenghis regjonâls o minoritariis judant e svilupant lis ativitâts di traduzion, dopleadure, postsincronizacion e sottituladure;

d) sigurâsi che i organisims incargâts di inviâ e prudelâ diviersis formis di ativitâts culturâls a completin in maniere adate la cognossince e l'ûs des lenghis e des culturis regjonâls o minoritariis tes operazions dulà che a àn la iniziative o che ur dan jutori;

e) facilitâ il meti a disposizion dai organisims incargâts di inviâ o di prudelâ ativitâts culturâls di personâl che al cognossi la lenghe regjonâl o minoritarie, in plui de(s) lenghe(is) dal rest de popolazion;

f) facilitâ la partecipazion direte, par chel che si inten ai imprescj e ai programs di ativitâts culturâls, di rapresentants di chei che a fevelin la lenghe regjonâl o minoritarie;

g) incoragjâ e/o facilitâ la creazion di un o di plui organisims incargâts di racuei, di ricevi in dipuesit e di presentâ al public lis oparis produsudis tes lenghis regjonâls o minoritariis;

h) se al covente creâ o promovi e finanziâ servizis di traduzion e di ricercje terminologjiche cun chê di mantignî e svilupâ, in particolâr, in ogni lenghe regjonâl o minoritarie une terminologjie amministrative, comerciâl, economiche, sociâl, tecnologjiche e juridiche adate.

2) Par chel che si inten a altris teritoris rispjet a chei dulà che lis lenghis regjonâls o minoritariis a son par tradizion dopradis, lis Parts si impegnin a autorizâ, incoragjâ e/o a previodi, se il numar di chei che a fevelin une lenghe regjonâl o minoritarie lu justifiche, ativitâts e imprescj culturâi adats daûr dal paragraf precedent.

3) Lis Parts si impegnin, te lôr politiche culturâl tal forest, a dâur un puest just aes lenghis regjonâls o minoritariis e ae culture che e je la lôr espression .

Art.13 Vite economiche e sociâl

1) Par chel che si inten aes ativitâts economicis e sociâls, lis Parts si impegnin; pal intîr paîs, a:

a) escludi de lôr legjislazion ogni disposizion che e dinei o che limiti cence resons validis l'ûs des lenghis regjonâls o minoritariis tai documents de vite economiche o sociâl e massime tai contrats di lavôr e tai documents tecnics, tant che lis istruzions par doprâ prodots o imprescj;

b) improibî di inserî, tai regolaments internis des impresis e tai ats privâts, clausulis che a escludin o che a dinein l'ûs des lenghis regjonâls o minoritariis almancul tra chei che a fevelin la stesse lenghe;

c) oponisi aes pratichis che a cirin di scoragjâ l'ûs des lenghis regjonâls o minoritariis te suaze des ativitâts economicis e sociâls;

d) facilitâ e/o incoragjâ cun altris mieçs in plui di chei previodûts tai ponts precedents l'ûs des lenghis regjonâls o minoritariis.

2) In fat di ativitât economiche e sociâl lis parts si impegnin, tai limits che lis autoritâts publichis indi àn competence, tal teritori dulà che lis lenghis regjonâls o minoritariis a son dopradis e te misure che al è pussibil in mût resonevul, a:

a) definî, cun lis lôr regolamentazions finanziariis e bancjariis, lis modalitâts che a permetin, tes condizions compatibilis cu lis usancis comerciâls, l'ûs des lenghis regjonâls o minoritariis te redazion dai ordins di paiament (assegns, cambiâls e vie indenant) o di altris documents finanziariis o se al covente, a sigurâ la metode in vore di chest procès;

b) tai cjamps economics e sociâi che a son sot dal lôr diret control (setôr public), realizâ azions che a incoragjin l'ûs des lenghis regjonâls o minoritariis;

c) sigurâsi che lis struturis sociâls tant che ospedâi, lis cjasis di polse, i ospizis a ufrissin la pussibilitât di ricevi e curâ te lôr lenghe chei che a doprin une lenghe regjonâl o minoritarie che a scuegnin jessi curâts par motîfs di salût, di etât o par altris motîfs;

d) sigurâsi, daûr precisis modalitâts, che lis istruzions pe sigurece a sedin parimentri redizudis tes lenghis regjonâls o minoritariis;

e) rindi di acès comun tes lenghis regjonâls o minoritariis lis informazions proferidis des autoritâts competentis a rivuart dai dirits dai consumadôrs.

Art.14 Scambis transnazionâi

1) Lis Parts si impegnin:

a) a aplicâ i pats bilaterâi e multilaterâi che a esistin che lis lein ai Stâts dulà che la stesse lenghe e je doprade in mût identic o pareli, o a procurâ di concludi pats, se al covente, di mût di facilitâ i contats tra chei che a fevelin la stesse lenghe tai Stâts interessâts, tai cjamps de culture, de istruzion, de informazion, de formazion professionâl e de istruzion permanent;

b) tal interès des lenghis regjonâls o minoritariis, a facilitâ e/o promovi la cooperazion transnazionâl, massime tes comunitâts regjonâls o locâls che tai lôr teritoris la stesse lenghe e je doprade in maniere compagne o parele.

PART IV **Aplicazion de Cjarte**

Art.15 Rapuarts periodics

1. Lis Parts a presentaran in maniere periodiche al Segretari Gjenerâl dal Consei de Europe, intune forme che e sarâ definide dal Comitât dai Ministris, un rapuart su la politiche praticade daûr de part II di cheste Cjarte e su lis misuris cjoltis par aplicâ lis disposizions de part II che a àn acetât. Il prin rapuart al à di sei presentât dentri dal an seguitîf ae jentrade in vigôr de Cjarte a rivuart de Part in cuistion, chei altri rapuarts a dadis di trê agns daspò dal prin rapuart.

2. Lis Parts a publicaran i lôr rapuarts.

Art.16 Esam dai rapuarts

1) I rapuarts presentâts al Segretari Gjenerâl dal Consei de Europe daûr dal articul 15 a saran esaminâts di un comitât di esperts formât daûr dal art.17.

2) Organizazions e associazions costituidis in mût legâl intune des Parts contraents, a puedin riclamâ l'atenzion dal Comitât di esperts su lis cuistions leadis ai impegns cjapâts di cheste Part in fuarce de part III di cheste Cjarte. Daspò di vê sintude la Part interessade, il comitât di esperts al podarà tignî cont di chestis informazions tal preparâ il rapuart previodût tal paragraf 3

di chest articul. Chestis organizacions e associazions a podaran cun di plui presentâ declaraziuns sul cont de politiche praticade di une Part, daûr de part II.

3) Su la fonde dai rapuarts previodûts tal paragraf 1 e des informaziuns previodudis tal paragraf 2, il comitât di esperts al prontarà un rapuart pal Comitât dai Ministris. Chest rapuart al sarà consegnât cu lis osservaziuns che lis Parts a saran invidadis a presentâ e al podarà jessi publicât dal Comitât dai Ministris.

4) Il rapuart previodût tal paragraf 3 al varà dentri in mût particolâr lis propuestis fatis dal comitât di esperts al Comitât dai Ministris pe preparazion, se al covente, di cualsisei raccomandazion di chest a une o plui Parts:

5) Il Segretari Gjenerâl dal Consei de Europe al fasarà un rapuart bienâl in detai ae Assemblee Parlamentâr sul cont de aplicazion de Cjarte.

Art. 17 Comitât di esperts

1) Il Comitât di esperts al sarà componût di un membri par ogni Part, nomenât dal Comitât dai Ministris intune liste di personis de plui alte integritât, cuntune competence ricognossude tes materiis tratadis de Cjarte, che a saran proponudis de Part interessade.

2) I membris dal Comitât a saran nomenâts par une dade di sîs agns e la lôr incarghe e je rinovabil. Se un membri nol pues puartâ fin insom la sô incarghe, al sarà sostituît seont la procedure previodude tal paragraf 1, e il membri nomenât al so puest al restarà te funzion fin al compiment de incarghe dal so predecessôr.

3) Il comitât di esperts si darà un so regolament interni. La sô segretarie e sarà previodude dal Segretari Gjenerâl dal Consei de Europe.

PART V Disposiziuns conclusivis

Art. 18

Cheste Cjarte e je disponibil pe firme dai Stâts membris dal Consei de Europe. E sarà sogjete a ratificazion, acetazion o aprovazion. I documents di ratificazion, acetazion o aprovazion a saran depositâts li dal Segretari Gjenerâl dal Consei de Europe.

Art.19

1) Cheste Cjarte e jentrarà in vigôr la prime dì dal mê, passade la fin dai trê mê daspò de dì che almanco cinc Stâts membris dal Consei de Europe a varan pandût il lôr consens a leâsi ae Cjarte, daûr des disposiziuns dal art. 18.

2) Par ogni stât membri che daspò al pandarà il so consens a leâsi ae Cjarte, cheste e jentrarà in vigôr la prime dì dal mê, passade la fin dai trê mê daspò de dì dal dipuesit dal document di ratificazion, acetazion o aprovazion.

Art.20

1) Daspò de jentrade in vigôr di cheste Cjarte il Comitât dai Ministris dal Consei de Europe al podarà invidâ ogni Stât no membri dal Consei a aderî ae Cjarte.

2) Par ogni stât aderent, la Cjarte e jentrarà in vigôr la prime dì dal mê, passade la fin dai trê mê daspò de dì dal dipuesit dal document di adesion al dal Segretari Gjenerâl dal Consei de Europe.

Art.21

1) Ogni Stât al pues, tal moment de firme o tal moment dal dipuesit dal so document di ratificazion, di acetazion, di aprovazion o di adesion, proferî une o plui riservis ai paragrafs dal 2 al 5 dal articul 7 di cheste Cjarte. No je ametude nissune altre riserve.

2) Ogni Stât contraent che al à proferide riserve in fuarce dal paragraf precedent al pues ritirâle dal dut o in part notificantlu al Segretari Gjenerâl dal Consei de Europe. Il ritirâsi al varà efiet cu la date dal riceviment de notificazion de bande dal Segretari Gjenerâl.

Art.22

1) Ogni Part e pues, in ogni moment, denunciâ cheste Cjarte mediant di notificazion al Segretari Gjenerâl dal Consei de Europe.

2) La denuncie e varà efiet de prime dì dal mê, passade la fin dai sîs mê daspò de dì dal riceviment de notificazion de bande dal Segretari Gjenerâl.

Art. 23

Il Segretari Gjenerâl dal Consei de Europe al notificarà ai Stâts membris dal Consei e a ogni Stât che al vedi aderît a cheste Cjarte:

a) ogni firme;

b) il dipuesit di ogni document di ratificazion, acetazion, aprovazion o adesion;

c) ogni date di jentrade in vigôr di cheste Cjarte daûr dai art. 19 e 20;

d) ogni ratificazion ricevude seont des disposizions dal articul 3, paragraf 3;

e) ogni altri at, notificazion o comunicazion a rivuart di cheste Cjarte.

Par testimoniance di chest, chei che a àn firmât sot vie, autorizâts a chest fin, a àn firmât cheste cjarde.

Fat a Strasburc ai 5 di Novembar dal 1992, par inglès e par francês, i doi tescj a son ducj e doi autentics, intun sôl esemplâr che al sarà in dipuesit tai archivis dal Consei de Europe. Il Segretari Gjenerâl dal Consei de Europe al trasmetarà copiis certificadis a ogni Stât membri dal Consei de Europe e a ogni Stât invidât a aderî a cheste Cjarte